

# SUPPLEMENTUM CONCILII ROMANI

Habiti Anno Christi 863.

## CAP. VI.

*De Johanne Archiepiscopo Ravennate.*

**J**ohannem Archiepiscopum Ravennatem, quem pro quibusdam necessitatibus Ecclesiasticis, & diversis præfunktionibus ad Synodum convocavimus; & quia à Nandeciso (1) Polensi Episcopo, nostro Præsulatui contra eum libello porrecto, pessimo hæreseos errore irretitus dicitur, & viva voce profertur, venire distulit atque contempsit, & pro illato crimine purificare se noluit: secundum sanctionem XIX. Capituli Chartaginensis Concilii, Sacrarum Missarum sollempniis, Corpore etiam & Sanguine Domini nostri Jesu Christi separamus, atque in præsentī Synodo excommunicamus, usque dum in nostra præsentia veniens hic Romæ purificationis ipsius videamus integritatem. Si qui verò illi communicare præsumserint, pari subiaceant excommunicatione conficti.

## CAP. VII.

*Quia Dominus Jesus Christus carne tantummodo passus est.*

**V**eraciter quidem credendum est, & omnimodis profitendum, quia Dominus Noster Jesus Christus Deus & Dei Filius passionem Crucis tantummodo secundum carnem sustinuit, Deitate autem impassibilis mansit, ut Apostolica docet auctoritas, & Sanctorum Patrum luculentissime doctrina ostendit.

## CAP. VIII.

*De his, qui Divinitatem passibilem dicunt.*

**H**I autem, qui ajunt, quia Redemptor noster Jesus Christus & Dei Filius passionem Crucis secundum Deitatem sustinuit, quoniam impium est, & Catholicis mentibus execrabile, anathema sint.

- (1) Ignotus fuit Episcopus iste Ughellio, ac proinde in Italia sacra adjungendus Catalogo Polensium Episcoporum.
- (2) Cujus Concilium ab Holstenio editum rursus in suam Collectionem intulit Labbeus Tom. IV.
- (3) Ad quos eo tempore spectaret electio Romani Pontificis, animadvertete.
- (4) Gratianus c. 28. dist. 33. Decretum Stephani Quarti Papæ, quem alii Quindum appellant, refert, ubi statuitur, quæ ratio adhibenda in posterum foret in electione Romani Pontificis. At qui Baronius, Binius, Papebrochius, Natalis Alexander, aliique Catholici, figmentum hoc & imposturam putarunt hominum impense faventium auctoritati Imperatorum, quo tempore fervebant bella inter Sacerdotium & Imperium. Contra Pagius in Critic. Baronian. ad ann. 897. germanum foetum esse Decretum illud contendit, non quidem Stephani IV. qui anno 817. vivere desiit, sed Stephani V. vulgo appellati VI.

*Explicit Concilium Beatissimi Nicolai Papæ.*

## CAP. IX.

*De his, qui dicunt, quia in Baptismate originale piaculum non omnibus dimittatur.*

**O**mnes enim, qui dicunt, quod hi, qui sacrosancti fonte Baptismatis, credentes in Patrem, & Filium, Sanctumque Spiritum, renascuntur, non æqualiter originali abluantur delicto, anathema sit.

## CAP. X.

*Statuta Concilii Beatissimi Leonis IV. Papæ inviolata permaneant.*

**O**mnes enim, qui à præsentī statuto Concilio sacra statuta venerandi Concilii Beatissimi Leonis (2) prædecessoris nostri IV. Præsulis violare tentaverit, ut post discessum beatæ memoriæ Sanctissimi Benedicti Pontificis antecessoris nostri actum recolimus, anathematis vinculo innodamus.

## CAP. XI.

*Ut electionem Romani Pontificis nullus contradicere præsumat.*

**S**i quis Sacerdotibus (3), seu Primatibus, Nobilibus, seu cuncto Clero hujus Sanctæ Romanæ Ecclesiæ electionem Romani Pontificis contradicere præsumserit, sicut in Concilio Beatissimi Stephani (4) Papæ statutum est, anathema sit.

## CAP. XII.

*De his, qui Episcopum percutere præsumserint.*

**D**E his autem, qui Episcopum percutere, verberare, aut cedere præsumserint, ut anathematis subiaceant periculo, sancimus, & inviolabili promulgatione statuimus.

qui anno 896. Papa electus est. Verum Acta Concilii Romani nunc mihi evulganda famosam hujusmodi controversiam dicere posse videntur. En ut Nicolaus I. de *Electioe Romani Pontificis* agens, ac turbas in ea exoriri solitas eliminare cupiens, confirmat, & observandum decernit, quidquid in *Concilio Beatissimi Stephani Papæ statutum est*. Ergo Decretum Stephani procul dubio Quarti eam in rem præcesserat. Hoc autem vix aliud esse potuerit, quam quod Gratiano laudatur; cui tamen si velis aliquid superaddidit a subsequitis Pontificibus, non repugnabo. In Concilio quoque Romano habito sub Lamberto Imperatore, atque adeo non anno 904. ut putavit Baronius, & post eum Labbeus Tom. IX. pag. 302. Collect. Concilior. sed quidem anno 898. roboratur antiqua consuetudo observata in electione Pontificis. Si antiqua tunc erat consuetudo, ergo ad tempora usque Stephani IV. Papæ illius initia non immerito deducantur.